

※ 書目文獻 ※

惜陰堂彙刻明詞跋（附校跋）（中）

趙尊嶽等撰 吳 格* 整理

071 錦囊詩餘一卷 會稽商景蘭媚生撰

商夫人字媚生，一字眉生，祁忠惠公室，吏部尚書周祚女。所著《錦囊詩餘》，一名《香籟集》，篇什甚富，詞亦秀蒨，《衆香集》甄錄不少。今觀集中若〈卜算子〉「春日寓山」、〈生查子〉「春日晚妝」、〈長相思〉「春景」諸闕，并皆雅令可誦。至〈燭影搖紅〉闕，以樸語寫至情，寓家國之感於變徵之音，視蓮社諸作庶幾趾美，而得之金閨碩媛，為尤非易易也。乙丑小春，校忠惠詞竟，并書卷尾。

同日以傳鈔益山藏集本校讀。未邕。

072 道援堂詞一卷 番禺屈大均翁山撰

大均，初名紹隆，字介子。番禺諸生。國變後易服為僧，名今種，字一靈，返儒後更今名。入越，讀書祁氏寓山園，不下樓者五月。漸游秦隴。歿後以文網特興，集本遂為禁書，詞益罕覩。此自蕙風篋藏鈔本傳寫，其〈夢江南〉「賦落葉」諸闕，哀感頑豔，上儷騷竺，不當與後主〈浪淘沙〉同傳耶？珍重閣。

丙子四月廿二日，以傳鈔蕙風篋藏本覆校。高梧。

073 湘中草一卷 古吳湯傳楹卿謀撰

卿謀，別字子輔。吳諸生，早擅才華，與尤西堂交篤，集中多倡和之作。詩詞專致綺語，意境遂未易超拔，蓋已涉於國初輕纖一派，不免歧趨矣，珍重閣識。

丙子四月廿二日，以傳鈔集本校。未邕。

* 吳 格，上海復旦大學圖書館古籍部主任。

074 芳雪軒詞一卷 吳江葉紈紈昭齊撰

紈〔紈〕，字昭齊，天寥長女。幼奇慧，三歲即能背誦〈長恨歌〉。十三四，學為詩詞。十七歲嫁，隨宦嶺西。十九歲，與婿同歸浙江。二十三歲病歿，距妹氏瓊章之喪甫七十日。紈紈亦好佛法，日課《金剛》、《楞嚴》諸經，深得寂滅之旨。遺著詩詞如千首，天寥為之編次，題曰《愁言》，即《芳雪軒遺集》，彙刻《午夢堂全集》中。茲裁取其詞，合於宛君、瓊章之列。葉氏姊妹同茲慧質，又同不永年，殊可哀已。癸酉浴佛日，叔雍。

同日以長沙葉氏覆刻本校讀。未邕。

075 陳忠裕公詞一卷 華亭陳子龍臥子撰

臥子，一字人中，行履具見國史本傳。乾隆間賜諡忠裕。詩高華雄渾，為一時所稱道。詞亦漸近沈著，非明季疲靡之音所可同日語已。趙尊嶽。

丙子四月廿四日，武進趙未邕據遼寫益山藏本《陳忠裕公集》本校讀一過。

076 溉園詩餘一卷 南昌萬時華茂先撰

茂先，崇禎徵士，一時聲名藉甚。《西江詩話》紀其臨歿，從容危坐，口占二首，有「窮通真偶爾，來去亦翛然。我愛裴中令，虛空不礙禪」語，則明心悟道之流，固有不同於凡俗者矣。所傳《溉園》、《東湖》二集，詞則附見《溉園》。余丁卯仲冬薄游京師，偶至大方家胡同圖書館，得獲循誦，即為最錄。時不逾晷，為示秋岳共賞之。珍重閣識。

同日以手寫京師藏本校。未邕。

077 凭西閣長短句一卷 東濱陸宏定紫度撰

明季二陸詞，夔笙先生所得舊鈔本，署孫式熊鈔存，各系小傳，疑其未有刻本，欲授梓未能也，以貽尊嶽。《蕙風詞話》有曰：「《凭西閣詞》篇幅增於射山，而風格差遜。射山間涉側豔，泊乎晚節，曩然河嶽日星，烏可以詞論人耶？」其〈小桃紅〉歇拍云：「終躊躇、生怕有人猜，且尋常相看。」因憶國初人詞有云：「丁寧切莫露輕狂，真箇相憐儂自解，妒眼須防。」此不可與陸詞並論。詞忌做，尤忌做得太過，巧不如拙，尖不如禿。陸無巧與尖之失。又射山〈虞美人〉云：「可憐舊事莫輕忘，且令三年無夢到高唐。」余甚喜其質拙。又〈一斛珠〉、〈醉春風〉

過拍，並為佳句。荏苒歲年，始付劄氏，先生乃墓有宿草，每一展卷，涕來無從矣。己巳仲冬，高梧。

同日以手鈔蕙風繆藏本福校。珍重閣。

078 支機集三卷 杜陵蔣平階大鴻 汝南周積賢壽王 大梁沈億年矩承撰

右《支機集》三卷，其第一卷為蔣平階撰詞，次則弟子周積賢、沈億年所分撰也。皆小令，無長調，溫厚馨逸，直逼《花間》。朱明一代，允推獨步。按平階字大鴻，華亭人。萬曆間諸生，工詩文，性豪雋，有古義俠風，晚年尤精堪輿術，凡言三元法者莫不宗之。又著《東林始末》一書，《四庫》著錄之而不及其名。周、沈并有著作。按明人詞集，多附全集以行，別傳者最所罕觀。黃虞稷《千頃堂書目》著錄較夥，亦不之見，蓋僅有單傳之本，授受之際，少一不慎，即且湮沒而無聞者矣。甲戌秋日，斐雲宗兄獲觀於廠肆間，估人謂自山左攜歸，索值至百金。書少殘缺，第三卷佚去一葉，少〈踏莎行〉一首，然尚不足為疵累。斐雲亟以見告，展轉得之，即付重錄，用識墨緣，亦以見斐雲之惠而好我，音磬之雅，雖三千里外無閒素心也。乙亥人日，趙尊嶽記。

同日以元刊本校讀。未邕。

079 弇州山人詞一卷 吳郡王世貞元美撰

世貞，字元美，自號鳳洲，又號弇州山人，吳郡人。嘉靖進士，官刑部主事。時楊繼盛下獄，為進湯藥，又代其妻草疏。楊死，復棺斂之。大忤嚴嵩，會其父忬失事灤河，嵩乃構忬於帝，繫獄。世貞兄弟伏嵩門乞貸，卒論死，哭泣持喪歸。隆慶初，伏闕訟父冤，復忬官。後官至刑部尚書，移疾歸。好為詩古文，始與李攀龍狎，主文盟。攀龍沒，獨主壇坫者垂二十年。其持論「文必西漢，詩必盛唐」，而藻飾特甚，晚年始趨於平簡。著《弇州山人四部稿》、《弇山堂別集》、《嘉靖以來首輔傳》、《觚不觚錄》、《讀書後》、《王氏書苑》、《畫苑》，而所批《綱鑑》尤盛行於世云。《明史》自有傳。癸酉上元，珍重閣識。

丙子五月初三日，以《四部稿》本校，蓋傳鈔益山所藏也。未雍並記。

080 天益山堂詞一卷 慈谿馮元仲次牧撰

元仲，不詳其仕履。崇禎末季有二馮者：長元颺，官至都御史，巡撫天津；次

元颺，官兵部尚書，慈谿人，蓋為其舅季行。壬申秋仲，余過析津，於友人案頭獲讀斯集。因錄其詞，行篋無書可資訂正，留俟異日也。叔雍。

同日以鈔本福校，既知益山亦有其書。高梧。

081 龍湖先生詞一卷 茶陵張治文邦撰

右《龍湖先生詞》一卷，附見於《文集》第十五卷，蓋其婿治中彭宣於嘉靖間所輯，門人薛應旂、雷禮、陳柏為之序。迨雍正四年，彭氏裔孫思眷復重校梓行之。龍湖行誼，別具傳略，雷禮復為撰本傳，具稱其志存經濟，不安於萎儒掇華襲馨，以竊章句。凡軍旅刑獄、錢穀水利之數，與夫邊隘夷險、地圖修阻、戶口登耗，無不講求其法。又斤斤自信，敢斷決銳，以辨正邪、明升黜為大務。及大計吏治，貴人嫉忤己者，欲擠之，持不可，竟不能奪。惡人趨競，有京朝官求正門下，甘詞申款，則正色戒之曰：「國家造士，以明經取用，乃敢遽污唐人之詩耶？」其嚴正若此。茶陵州嘗有龍化湖，故有讖：「龍湖坼，榜元出。」正德己卯，忽嘆涸龜裂。明年，治舉進士第一，遂自號龍湖。又其母譚夫人夢大鳥倏戛雲下，朱顛玄吭縞羽，止於庭前，忽縮化入襟裯間，已而驚寤。其父伯誠曰：「此鶴徵也。」踰年而生先生。及其將病，忽夢乘鶴游戲，飄飄若出九垓，覺而占之曰：「吾始妊之祥，殆將反化以歸乎？」其神異又如此。詩餘凡二首，附應制燕樂歌五首，茲併存之。庚午小除夕，高梧。

同日以集本校定。高梧。

082 晚聞堂詞一卷 星源余紹祉子疇撰

紹祉，字子疇，初號元邱，沱川人。太僕卿一龍孫。幼有至性，及稍長，負俠好客，師事尚寶黃公龍光。天啟末，黃以建言忤權璫謫戍，祉不畏誅，立往慰，且助之。太僕邱公禾嘉視婺篆，於稠人中與論天下事，折服敬畏，紹祉毫無所關。試不售，築室學道，號疑庵居士。兵憲唐公良懿稱其學在朱、陸之間。晚謝世緣，托蹟僧寺，參密雲大師，以詩歌見志。甲申國變，聞詔至咳血，緇服入高湖山。有司禮召再三，終不赴。卒年五十三。所著《賦草》一卷、《詩草》四卷、《雜文》二卷，《山居瑣談》、《元邱素話》、《訪道日錄》各一卷。子藩卿，字翰臣，能繼其學，其再侄孫知章輯而刊之，曰《晚聞堂稿》，周沐潤為之序。道光間，和源單氏又為覆鐫。歲在癸酉立春後一日，帥南社兄見之海上塵肆，舉以相告，即往購讀，並輯其雜文中僅存之一詞，列於明季諸賢，用彰大節云。珍重閣識。

同日以刊本校讀。未邕。

083 青霞詞一卷 會稽沈鍊純甫撰

鍊，字純甫。嘉靖進士，知溧陽，參金吾軍，由言事詆宰執，遷（在）〔在〕平。入為錦衣衛經歷。性剛直，嫉惡如讐。會俺荅犯京師，詔廷臣博議，鍊昌言敵由嚴嵩父子，上疏劾嵩十大罪。帝大怒，杖之數十，謫佃保安。邊人慕其忠義，多遣子就學。鍊恨嵩父子，縛草象李林甫、秦檜及嵩，令子弟攢射之。總督楊順巡按，路楷承嵩旨，誣鍊與白蓮妖人閻浩等謀亂，遂棄市。後事解，追諡忠愍。後其子襄始以遺集屬之俞咨益，為梓行之，俞又屬歸安茅維為之序。附幃詞三首，為汰其引而存之。壬申小冬，趙尊嶽。

084 心遠堂詞一卷 無錫王永積崇巖撰

永積，無錫人，自號蠡湖外史。崇禎進士，官至兵部郎中。著《錫山景物略》、《心遠堂集》。余曩在杭州獲讀於西湖書藏，因輯存之。癸酉花朝日，叔雍。

同日以西湖書藏傳鈔本校讀。未邕。

085 趙文肅公詞一卷 內江趙貞吉孟靜撰

文肅，字孟靜，學者稱大洲先生。嘉靖十四年，登進士第，選庶吉士，授編修，遷中允，掌司業事，擢左諭德，兼監察御史。迨時相嚴嵩，下詔獄，杖於庭，謫荔波典史。稍遷徽州通判，累遷南京戶部右侍郎，復坐事奪官。隆慶初，起禮部左侍郎，掌詹事府，攝太學祭酒，充日講官兼文淵閣大學士，參預機務，加太子太保，得請歸。萬曆十年卒，贈少保，諡文肅。有集三十三卷，詩五卷，詞一首附存全集，刑部尚書丹陽姜寶為之序。文肅於吾儒外兼通釋、老二氏，所著書，內篇為經世，外篇為出世，蓋篤學明性之流，不僅以功業見稱者也。壬申臘日，趙尊嶽書。

同日以西湖書藏本校。高梧。

086 王奉常詞一卷 吳郡王世懋敬美撰

敬美，嘉靖進士，累官太常少卿。好學，其詩文名亞乃兄，先世貞三年卒。著《王奉常集》、《藝圃擷餘》、《闕天外乘》、《遠王文》、《卻金傳》、《學圃雜疏》、《閩部疏》、《三郡圖說》、《名山游記》。其行誼附見《明史》世貞傳中。癸酉上元，珍重閣並識。

同日以益山所藏《王奉常集》傳鈔〔本〕校讀。高梧。

087 聖雨齋詩餘二卷 馮李周拱辰孟侯撰

拱辰，字孟侯，桐鄉人。崇禎歲貢生。長文學，著《莊子影史》、《離騷草木史》、《離騷拾細》、《公羊墨史》、《南華真經影史》、《聖雨齋詩文》，詞二卷附，當湖金柳城璞玉、婁江浦甄玉為琛為刊其集。余過江寧，得之於益山書舍，因裁出其詞，以合於明季諸家。漸又見光緒九年其七世孫重刊本，遂為覆校付鋅云。癸酉春仲，高梧。

同日以兩本互校。未邕。

088 采隱詩餘一卷 華亭莫秉清紫仙撰

秉清，字紫仙，一字葭士。是龍子。明季諸生。遭鼎革，誓不出山，以吟咏自遣。所著文章，勿顧忌諱。終清代二百六十餘年，子孫藏其稿不輕示人。同光間，有人請於其孫春颿者，欲壽之梨棗，春颿婉卻之。清社既屋，其七世孫子經屬明經雷君毅校刊之。書成，子經已先逝。全集凡文集二卷，詩二卷，有錢玉度、張齊廉序，詩集有葭士自序。全集之行，余得受而讀之，裁其詩餘，合諸翁山、二陸之林，胥明季詞林之大師也。壬申歲不盡二日，珍重閣識。

丙子天中節前夕，以近刊活字本校。未邕。

089 北海詞一卷 臨朐馮琦用蘊撰

琦，字用蘊，一字琢庵，臨朐人。大父惟重，有名於時。琦萬曆成進士，累官至禮部尚書。蒞政勤肅，力抑營競，學有根柢，數陳讜論，卒諡文敏。著《北海集》、《經濟類編》，《明史》自有傳。填詞其餘事也。癸酉孟春，叔雍記於卷尾。

同日以益山舊藏集本傳鈔〔本〕校讀。高梧。

090 東江別集三卷 仁和沈謙去矜撰

去矜，明季人，居臨平。幼特穎異，尤勤習誦，居其家之南樓者二十年。崇禎壬午，補縣學生。性友愛，析居後事其兄者益篤。父病，衣不弛帶，居喪毀瘠。娶於徐氏，得六子。去矜不治生產，順治間，遂嗣先人為歧黃業。自喪妻及長子，益以歌獻自遣。於學雖勿專而極博，每憑南樓，與毛稚黃、張祖望相酬答。文望所歸，號「西冷十子」。後復輯數椽，曰「東江草堂」，即以為號。所著詩賦二十一卷、

文十卷、《詞學》十二卷，又有《詞韻》、《詞譜》、《南曲譜》、《古今詞選》，多有刻本，流播未廣。《別集》一卷，為填詞、南北曲。《四庫存目》著錄之，然絕罕覩。泉唐丁氏嘗有傳鈔本，既而歸之金陵益山書藏，凡詞三卷、曲二卷，燦然大備矣。歲在己未，歸安姚虞琴社兄景瀛以《別集》無他本，重為排印，其書始顯。拙藏則亦傳鈔丁本，與姚刻同源者也，茲刪其南北曲，為梓行之。癸酉仲春，珍重閣。

同日以姚刊本及傳鈔本互校。未邕。

091 蒼谷詩餘一卷 郟縣王尚綱錦夫撰

尚綱，字錦夫，郟縣人。弘治十五年，登進士第，授兵部主事，歷員外郎，陞郎中，出為山西左參政，調任四川，引疾歸。起補陝西左參政，遷浙江右布政使。卒，鄉里私諡曰「貞孝文子」。有《蒼谷集》十二卷，詩餘附。余曩者獲讀於金陵，因為輯錄，以授梓人。甲戌立春日，叔雍。

丙子天中節，就傳鈔益山藏本校。未邕。

092 勉齋詞一卷 慈谿鄭滿守謙撰

勉齋，弘治舉人，官至濮州知府，著《勉齋遺稿》，幃詞五首附焉。茲刪其駢儷引序，而存其詞。癸酉臘月，珍重閣。

同日以傳鈔益山藏本校讀。未邕。

093 平山堂詩餘一卷 沂水劉應賓思皇撰

思皇，天啟進士，官安徽巡撫，又轉他省，旋擢都察院僉都御史。著《平山堂詩集》，詞附。此即自集中裁篇以出者也，亟郵叔雍宗兄梓之。歲次癸酉臘月，海寧趙萬里並識。

同日以斐雲鈔本校。未邕。

094 圭峰先生詞一卷 建武羅玘景鳴撰

玘，字景鳴，學者稱圭峰先生，南城人。由諸生輸粟入國學。成化二十三年，登進士第，選庶吉士，授編修，進侍讀。正德初，累遷南京太常卿，擢南吏部右侍郎，引疾歸。卒贈禮部尚書，諡文肅。有集十八卷，續集十五卷，幃詞附。茲為輯出，列諸明詞別集云。甲戌立春日，叔雍。

同日以傳鈔益山藏元刊本校。未邕。

095 雙江詩餘一卷 永豐聶豹文蔚撰

豹，字文蔚，永（定）〔豐〕人。正德十二年，登進士第，除華亭知縣。嘉靖四年，召拜御史，巡按福建，出為蘇州知府，憂歸。補平陽知府，擢陝西副使，備兵潼關。大計，坐乾沒落職。二十九年，召拜右僉都御史，擢兵部右侍郎，尋轉左，進尚書，加太子少保，廕錦衣，世千戶，累進太子太保，以中旨罷歸，卒。隆慶初，贈少保，諡貞襄。有《雙江先生集》，附詞三首，蓋獄中作也，存之以備家數。癸酉臘月，叔雍。

同日以傳鈔益山藏本校讀。高梧。

096 苑洛詞一卷 朝邑韓邦奇汝節撰

邦奇，字汝節，朝邑人。正德三年，登進士第，除吏部主事，進員外郎。上疏論時政忤旨，謫平陽通判。遷浙江僉事，復忤中官在浙者，坐斥為民。嘉靖初，起山東參議，改山西，乞休去。起四川提學副使，入為右庶子。七年，主應天試，坐試錄謬誤，謫南太僕丞，復乞歸。起山東副使，進大理少卿，以右僉都御史巡撫宣府，進右副都御史巡撫遼東，換山西督河道，遷南刑部右侍郎，進兵部尚書致仕。卒贈太子少保，諡恭簡。有《苑洛集》二十二卷，詞一卷，南北曲附。此其輯本也。癸酉臘日，高梧。

同日未邕校傳鈔益山藏本。

097 古山詞一卷 安仁桂華子樸撰

華，字子樸，安仁人。正德八年舉人。著《古山集》四卷，其弟萼為梓行之。萼，蓋（任）〔仕〕至禮部尚書者也。余所得見為史珥重校，而其九世從孫五同弟瞻等重刊本，蓋非明刻之舊矣。集附幃詞，刪其序而存之。癸酉臘日，叔雍。

同日以傳鈔覆刻本校讀。高梧。

098 湘泉詞一卷 全州蔣冕敬之撰

敬之，成化進士，正德間累官戶部尚書。時主昏政亂，冕持正不撓，有匡弼功。世宗初，朝政維新，而上下捍格彌甚，冕守之不移。任首輔僅兩月，卒齟齬以去，論者謂有古大臣風。卒諡文定。《明史》自有傳。著《湘泉集》及《瑤臺詩話》，

此則附載集中者也。癸酉長至日，高梧。

同日以刻本校讀。珍重。

099 鏡山詩餘一卷 歙縣李汎彥夫撰

汎，字彥夫，歙人（按：一作祁門人）。弘治十八年，登進士第，官工部郎中，出為思恩知府，致仕。有《鏡山稿》十三卷。《詩餘》一卷，余得之海上，每卷端署「歙縣李」而闕其名。據《國史經籍志》，知為李汎之作。《千頃堂書目》亦著錄是書，「歙」作「祁門」，與《經籍志》異。詩多作於弘治、正德、嘉靖間，與李汎登第之年正合。《詩餘》有「客寓梧州寺」〈漁家傲〉、「梧州寺挹清亭上作」〈臨江仙〉、「梧州欠井寺作」〈天仙子〉各一闕，賓州、梧州皆廣西省屬，而汎曾守思恩，足以證之。惟卷首闕名不可解，或書賈纂奪脫刊之誤，亦有所諱耶？癸酉臘日，叔雍。

同日以原刊本校讀。未邕。

100 倪文僖公詞一卷 上元倪謙克讓撰

謙，字克讓，其先錢塘人，徙上元。正統四年，以一甲三名登進士第。歷編修。景泰中，以左中允兼侍讀，遷侍講學士，與子岳同入史局。改南京掌院，奉使高麗，終南京禮部尚書。卒贈太子少保，諡文僖。有集三十二卷，詩餘附，多題畫之作，雅雋可誦也。丙寅歲不盡四日，高梧軒校記。

同日以傳鈔益山藏集本校讀。珍重。

101 西郊笑端詞一卷 松江董紀良史撰

紀，字良史，以字行，更字述夫。上海人。洪武十五年，舉賢良方正，擢江西按察僉事，辭歸，結西郊草堂以終老。有《西郊笑端集》二卷，詞附。余得之於金陵，歸示蕙風先生，欣然共讀。時先生方輯《歷代詞人考鑒》，因錄副以貽之。丁卯三月，高梧軒書。

丙子天中日，以傳鈔益山藏本校。高梧軒記。

102 翠屏詞一卷 古田張以寧志道撰

以寧，古田人。父一清，元福建江西行省參知政事。泰、宣中以《春秋》舉進士，授黃巖州判官，累遷至翰林侍讀學士，知制誥。以博雅擅名，人呼為「張學士」。

明師取元都，太祖仍授侍讀學士，知制誥，兼修國史。洪武二年，使安南，冊封陳日燿為國王。甫抵境而日燿卒，其兄子日燧嗣位，遣臣來迎，請誥印。以寧不予，曰：「奉詔封爾先君，不言世子。」留居洱江上，使世子告哀請襲。既得命，然後入境將事。及還，道卒。詔有司歸其柩，所在〔至〕〔致〕祭。以寧以《春秋》高第，故治《春秋》多所得，撰《胡傳辨疑》最辨博。家翠屏山下，學者稱「翠屏學士」。著《學士集》，詞二首附焉。丁卯仲春，叔雍。

同日以傳鈔益山藏本校。高梧。

103 鄱陽詞一卷 鄱陽劉炳彥昂撰

炳，字彥昂（案：《明詞綜》小傳字彥章，誤），以字行，鄱陽人。洪武初，獻書言事，授中書，博士廳諮議典籤，出為大都督府掌記。有《鄱陽集》九卷，詞一卷（案：卷端署《南詞》，《明詞綜》小傳，《春雨軒詞》一卷），未題「春雨軒」名也。乙卯三月，高梧軒。

同日以傳鈔益山藏本校。高梧。

104 鳴盛詞一卷 福唐林鴻子羽撰

林鴻，明初人。以人才薦至京師，太祖臨軒試士，以〈龍池春曉〉及〈孤雁〉二詩稱旨，名動京師，官至精膳司員外郎。自免歸，與閩縣周元、鄭定，侯官黃元、王褒、唐泰，長樂高棅、王恭、陳亮，永福王偁，號「閩中十才子」，而鴻為之冠。其所暱張紅橋能詩文，輒與唱酬，終委身事之，一時傳為豔遇。集中〈蝶戀花〉「記得紅橋西畔路」一首，蓋紅橋作，誤入《鳴盛集》中者。茲依明本授梓，故未為刪乙，一如其舊云。丙寅天中節，珍重閣。

同日以傳鈔益山藏本校。未邕。

105 楊文敏公詞一卷 建安楊榮勉仁撰

榮，初名子榮，字勉仁。建文進士，授編修。成祖簡入文淵閣，為更名榮。有才智，見事敏捷，最受帝知，每北巡及出塞，必令扈從。仁宗立，累進謹身殿大學士、工部尚書。宣德中，加少傅。正統中卒，諡文敏。榮歷事四朝，有謀能斷，與楊士奇、楊溥並入閣，稱「三楊」，榮最以才著。詩文雍容平易，肖其為人。著《北征記》及《文敏集》，王直為之序。詞載集中，此其裁篇別出者也。癸酉陽月，叔雍。

同日以傳鈔西湖書藏本校。高梧。

106 毅齋詩餘一卷 錢塘王洪希範撰

希範為「閩中十才子」之一，年十八，成進士，授翰林檢討。永樂初，與修《大典》，歷修撰、侍講。帝頒佛曲於塞外，命洪為文，逡巡不應詔，為同列所排，遂不復進用。著《毅齋集》，八詞詠「夾城八景」者附焉。為別裁篇，以合於明初諸詞家云。癸酉陽月，叔雍。

同日以傳鈔西湖書藏本校。高梧。

107 容春堂詞一卷 無錫邵寶國賢撰

國賢，成化進士，累官江西提學副使。釐革澆俗，修白鹿書院學舍以處學者，教人以致知力行為本。宸濠索詩文，峻卻之。正德中，遷右副都御史，總督漕運，忤劉瑾，勒致仕。瑾誅，陞戶部侍郎，拜南禮部尚書，懇辭。嘉靖初，起前官，復辭。卒諡文莊，學者稱「二泉先生」。著《左鱗》、《學史》、《簡端》二錄，《定性書說》、《漕政舉要》、《慧山記》，《容春堂詞》則載諸集中者也。癸酉陽月，叔雍。

同日以傳鈔西湖書藏本校，高梧。

108 歸田詞一卷 餘姚謝遷于喬撰

于喬，一字木齋。成化進士第一，授修撰。弘治中，以少詹事入內閣，參預機務，尋加太子少保、兵部尚書，兼東閣大學士。遷秉節直亮，與劉健、李東陽同心輔政，而見事尤敏，天下稱賢相。武宗嗣位，加少傅，請誅劉瑾，不納，遂與健同致仕。嘉靖中，手勅促起，入相數月，仍以老辭歸。卒諡文正。著《歸田稿》八卷，康熙中其族孫為重梓之，余為別存其詞焉。癸酉陽月，高梧軒。

同日以傳鈔西湖書藏本校。高梧。

109 虛舟詞一卷 三山王侑孟敷撰

孟敷，王翰子，為「閩中十才子」之一。洪武中領鄉薦，永樂初授翰林檢討，出官袁州，漸〔薦〕與修《大典》，學博才雄，最為學士解縉所推重。後以縉事連及，繫獄中。所著《虛舟集》，桑悅為之序，稱其臨終有〈自誄詞〉一篇，與陶淵明、秦少游自挽詩意同，得陶之曠達、秦之悽愴，讀之令人淚下也。詞一首，附集

中，因為別錄以行焉，癸酉臘日，高梧軒。

同日以傳鈔西湖書藏本校。高梧。

110 抑庵詩餘一卷 泰和王直行儉撰

王直，伯貞子。永樂進士，授修撰。歷仕仁宗、宣宗，遷少詹事，兼侍讀學士。在翰林二十餘年，稽古代言、編纂紀注之事，多出其手，與王英齊名，時有「東王」、「西王」之目。英宗時，累拜吏部尚書。秉銓十四年，為時名臣。卒諡文端。著《抑庵集》，廬陵劉教為之序，蓋直五世孫有霖乞教為編訂者也。詞附集中，為別行之。癸酉臘日，珍重閣書。

同日以傳鈔西湖書藏本校。高梧。

111 頤庵詩餘一卷 南昌胡儼若思撰

頤庵嗜學，於書無所不窺，凡天文地理、律曆醫卜，均所精擅，又長書畫。洪武中，以舉人授華亭教諭。永樂初，薦入翰林，歷官國子祭酒，朝廷大著作多出其手。居國學久，以身率教，動有師法。洪熙初，進太子賓客，兼祭酒。致仕，歸閒二十餘年卒。著《頤庵集》，涵虛子為之序。余疇昔得讀於西湖，因為錄副以存之。癸酉臘日，叔雍。

同日以傳鈔西湖書藏本校。高梧。

112 震澤詞一卷 震澤王鏊濟之撰

鏊，吳縣人。成化間，鄉、會試皆第一，授編修。弘治時，歷侍講學士，充講官。時中貴李廣導帝游西苑，鏊講「文王不敢盤游於田」，反覆規切，帝為動容。正德初，累進戶部尚書、文淵閣大學士。時劉瑾銜韓文、劉大夏，欲殺之，又欲以他事中劉健、謝遷，鏊力救得免。未幾，以志不得行，力求去。鏊博學有識鑒，文章爾雅，議論明暢。卒諡文恪。著《姑蘇志》、《震澤集》、《震（仲）〔澤〕長語》、《春秋詞命》、《史餘》諸書。南海霍韜序其集，盛稱其人品學力有格，尤拳拳於不通壽寧侯及忤瑾二端焉。詞、南北曲附見集中，曲非所長，因為乙去，僅存其詞焉。癸酉殘臘日，叔雍。

同日以傳鈔西湖書藏本校。高梧。

113 整庵詩餘一卷 泰和羅欽順允升撰

允升，弘治進士，授編修，遷南京國子司業。與祭酒章懋，務以實行造士。乞養歸，劉瑾怒，奪職為民。瑾誅，復官，累遷南吏部右侍郎。世宗立，擢吏部尚書。時張璁、桂萼以議禮驟貴，樹黨屏逐正人，欽順恥與同列，乃辭不拜。里居二十年，潛心格物致知之學，著《困知記》，辨析精審，學者稱「整庵先生」。卒諡文莊。所著曰《整庵存稿》，喻時序之，盛稱其學。附二詞，因為輯存之。癸酉臘日，叔雍。

同日以傳鈔西湖書藏本校。高梧。

114 翠渠詞一卷 莆田周瑛梁石撰

梁石，成化進士，知廣德州。弘治初，為四川參政，進右布政使。咸有著績，尤勵清操。其學以居敬為主，學者稱「翠渠先生」。著《書纂》及《翠渠類稿》，前有嘉靖戊子蜀人馮馴序，蓋其甥林雲從以《類稿》摘鈔付梓也。乙丑重五，余獲讀於西湖書藏，為錄其詞，並志歲月。叔雍書。

同日以傳鈔西湖書藏本校。高梧。

115 執齋詩餘一卷 萬安劉玉咸栗撰

咸栗，弘治進士，知輝縣，陞御史，以忤劉瑾削籍。瑾誅，起河南按察司僉事，官至刑部右侍郎。坐李福達獄，削籍歸，卒。隆慶初，諡端毅。《執齋集》二十卷，其門人傅鎮源所輯，刊於濟南。鄉人山東故御史彭黯為之序，稱先生未第時，與張子靜、蔡虛齋書，憫斯道之缺絕，不顧流俗，不避姍笑，直以聖學自任。及任刑部侍郎，持議與權貴人不合，輒謝政以去云。道光庚寅，裔孫翹等復為重校雕行。三詞附見詩集，因為裁篇迻寫。同日又得張龍湖詞，并校付梓，為記歲月。庚午歲不盡四日，叔雍記。

同日以原刊本校讀。珍重閣。

116 窺詞管見一卷 仁和李漁笠翁撰

明人雖作詞，而未必工之。詞話所傳，僅數家耳。笠翁斯作，自以為度盡金針，實則文心所通，固當於多讀、多作中求之，不宜懸格以求也。然其持論，亦間有可取處。論詩詞之與南北曲，得消息於環中，足為學詞者之一助。頃校刊其詩餘，因并付墨焉。甲戌花朝，珍重主人記。

丙子五月初六日，以近刊《一家言全集》本校。未邕。

117 笠翁詩餘一卷 仁和李漁笠翁撰

笠翁，仁和人，生明末季。傲放山林間，與貴介游，能治宮室，辨聲妓，人多樂而顧之，因以隱逸傳於世，蓋余澹心一流人也。文字不高，然能逞機鋒，務為小巧，亦有雅令可誦者。遺著詩文詞集、史評十卷，《閒情偶集》六卷，都為《一家言》。外則傳奇十種，咸有刊本。詞在全集卷八，附詞話二十二則，今裁刻其詞，以備家數云。甲戌燕九日，珍重閣書。

丙子五月十三日，以《一家言》坊本校之。未邕。

118 坐隱先生精訂草堂餘意二卷 下邳陳鐸大聲撰

曩治詞學，讀《渚山堂詞話》，屢及陳大聲，謂其有宋人風致，使雜之《草堂集》中，未必可辨；又謂篇中亦時有佳句，凡此婉約清麗，使其用為己調，當必擅聲一時，而以之追步古作，遂蹈村婦鬪美毛、施之失。漸從蕙風先生游，於其《選巷叢談》、《蘭雲菱夢樓筆記》又屢稱陳詞，謂具澹厚之妙，足與兩宋名家頡頏。半唐借去未還，繆藝風至欲為大聲一哭。按鐸字大聲，下邳人，萬曆時官指揮使。《明詞綜》載其一闕，未足盡其流播也。其書越三十年見於京師廠肆，徐森玉社兄博學好古，見之即飭胥影寫精本，藏之篋衍。癸酉孟夏，余以事北行，寇迫京師，而談藝之樂，一如恆日。忽一日，森玉出以相眎。愛不忍釋，且謀復鏤，遂慨然舉以相贈。厚我者何止百朋而已。亟挾之南歸付墨，亦庶可彌半唐、蕙風、藝風三先生之遺憾。素雲有知，黃鶴來下，其亦執卷以共為欣賞乎？是年九月朔日，趙尊嶽跋記。

又全書為大聲撰，然多引用原作者姓名，其本無名者始用陳名，此亦刊例之至奇者，未嘗經見，特揭而出之。尊嶽校畢再記。

丙子五月以景鈔本重校一過。未邕。

119 山海漫談詞錄一卷 長治任環應乾撰

環，字應乾，嘉靖甲戌進士，令廣平，調沙河，補滑縣，所在皆有仁政。以卓異補蘇郡同知。適倭賊至，一時幾莫與爭鋒。當道譖其方略，檄以討賊。躬擐甲冑，跋履山川，前後百餘戰，斬首五萬餘級。館人搏賊以代死，義媼投井以全節，凡此沐德，咸知嚮義。倭亂卒平，德化具徵矣。既而以制歸廬墓，未及起復而卒。求忠臣於孝子之門，其此之謂矣。遺集曰《山海漫談》，蓋其六世孫世變字理臣者所編，凡詩文咸付校輯，並及先輩所紀平倭事蹟、章奏、諭祭諸文，都為一編，刊成於康

熙間，郃世爵為之序。此則自《漫談》裁篇迻寫者也。壬申臘日，珍重閣。

丙子五月十四日，暑熱雨後校刊本。未邕。

120 癡山詞一卷 杭州陳孝逸少游撰

孝逸，字少游，杭州人。崇禎間諸生，性淡泊，隱居不仕。著《癡山集》，臨川傅占衡為之序。占衡與少游以文章相切礪，傅居西溪，陳居迎仙山，相距二里許。「迎仙」即少游取以號癡山者也。論文一以簡婉澹約為尚，而以不作文字為主，其學可從知也。集凡六卷，詞附存，因以授梓，並最傳序以代跋言。珍重閣。

同日未雍校西湖書藏本。

121 海壑吟稿一卷 膠州趙完璧全卿撰

完璧，字全卿，號雲壑，晚號海壑。由貢生官至鞏昌府通判。其詩文集曰《海壑吟稿》，萬曆十年浙西王三錫為之序，謂：「先生性靈揮灑，蟬脫塵表，而浩氣充然，利害生死不足介其際。嘉靖間，筮宦司城，抗職忤權姦，與楊椒山公同厄。人僉謂先生談笑當之，與椒山賡歌迭唱，竟荷聖斷得白。已而出判秦中，聲名藉藉。無何，敝（蹤）〔屣〕簪綬，益肆吟弄。迨於今踰耄望耄，手不停絲桐，興至，浩歌敲金石，刺刺不休。此其人豈所謂關天地、參盛衰者耶？」平生行誼，於茲可見。詩餘四首，附見集中，因為裁篇，并刪其帳詞，以列於嘉靖諸家云。壬申小除日，武進趙尊嶽跋。

同日校傳鈔西湖書藏本。高梧。

122 百琲明珠五卷 新都楊慎升庵選

升庵才大如海，所為詞六卷，已付梓人，獨其評選諸集，若《百琲明珠》、《填詞玉屑》之見於全書目錄者七八種，迄不可得見。聞蜀中尚有叢書小字本，道遠亦未易致之也。癸酉孟夏，京師陷重圍中，余始襤被北行，折衝間幾不可終日，猶以詞翰自娛。斐雲宗兄乃出眎明刊此本，題「嘉靖朝蜀楊慎選集，萬曆朝楚杜祝近訂補」，有祝進一序，古墨流馨，並有曹棟亭、韓李卿、汪退思、張竺孫諸家藏印。半葉十行，行二十字，并於每葉題刻工姓名。久懸想望者，至此倖慰長思矣。其書旋歸北海書藏，斐雲留影見惠，而江寧唐圭璋社兄亦以景鈔本寄示，因亟付鏤，麗諸《升庵詞集》之後。所冀天壤間佚書漸出，即升庵所選輯者均獲傳見，則流播之責，余固樂任不疲也。寫樣既成，為綴跋言。是歲九日，叔雍書。

同日校景寫本。未邕並記。

123-124 桂洲集六卷桂洲集外詞一卷 貴谿夏言公謹撰

貴谿行誼，具詳《明史》，不具書。曩日過金陵益山書藏，獲讀《賜閒堂稿》，因飭工裁錄其詞。稿凡二集。一得五十六首，一得七十六首，意其詳盡，行授梓人矣。王申冬日，復見明刊本《桂洲集·玉堂餘興》，蓋嘉靖間皇甫汈刊於吳中者，都六卷，每半葉十行，行十八字，每行輒空首二字，其有涉及廟堂者則頂格書，同於制策之雙擡。詞籍刊本，體制特崇，殊復罕覯。余舊藏《延露詞》原刻本，亦視界闌低二格，每用為異，茲乃知其有所沿溯。意者貴谿官階特達，詞籍又及身刊行。故不得不師制策之成格，用為頌聖之資乎？書題「桂洲集」，別題「玉堂餘興」一行。據跋，則單行詞籍，初不麗於《桂洲全集》者也。六卷合詞二百五十五首，視《賜閒》多至倍蓰。然以校《賜閒集》，除互見外，又得別出者八十首，其間復有字句題目之異同，大約以《桂洲》為較勝。茲刻率準《桂洲》，原有序跋一不刪乙；而《賜閒堂集》之八十首，則次第二集別編之，題曰《桂洲集外詞》，纒屬以行。貴谿所作，庶備於是矣。癸酉元夜，高梧軒識。

丙子五月杪，武進趙未雍以明刊本校讀。人事倏口，亡輟兼旬，徒喚奈何。

125 石門詞一卷 石門梁寅孟敬撰

寅，字孟敬，學者稱石門先生，又稱「梁五經」，新喻人。元末累舉於鄉，不第，辟集慶路儒學訓導。居二歲，以親老辭歸，隱居教授。洪武初，徵入禮局，書成，賜金幣。有《石門集》，詞附。漚尹侍郎已據吳伯宛校唐鷓庵鈔本，刻入《彊邨叢書》，列諸元代。惟首缺六闕，又多誤字，至不可讀。考孟敬出仕朱明，以次於明，亦未始不可也，為特以明刊本重付剞劂，並為校記。乙卯六月，高梧軒。

丙子五月杪，以益山書藏明刊本校正。珍重闕。

126 華泉詞一卷 歷城邊貢廷實撰

貢，字廷實，號華泉，歷城人。弘治九年，登進士第，除太常博士，擢兵科給事中，改太常丞，遷衛輝知府，改荊州，歷陝西、河南提學副使，以母憂家居。嘉靖改元，起南京太常少卿，陞太常卿，督四夷館，擢南刑部右侍郎，拜戶部尚書。都御史劾其縱酒廢職，罷歸。有集十四卷，詩餘附。余得其集於金陵，因次其詞，

以付梓人。太歲在癸酉臘日。叔雍。

丙子五月廿九日，以傳鈔益山書藏明刊本校讀。高梧。

127 東海詞一卷 華亭張弼汝弼撰

汝弼，華亭人，以家近東海，遂以為號。成化二年，登進士第，授兵部主事，陞員外郎。以忤當路，出為南安知府，謝病歸。以有政績，士民為立祠。著文集五卷、詩集四卷。詞二首附，即此是也。益山書藏有全集，蓋仁和丁氏八千卷樓故物。曩歲過金陵，移錄付梓，並題歲月。甲子元月，高梧軒書。

同日校傳鈔益山藏明刊本。未容。

128 未軒詞一卷 莆田黃潛仲昭撰

仲昭，成化丙戌進士，授編修。三年十二月，帝將以明年元夕張鐙，命詞臣撰詩詞進奉，仲昭疏諫。帝以其妄言，杖之闕下。謫湘潭知縣，未行，改南京大理評事，遂請歸省。服闋赴京，又引疾乞歸。家居十七年，出為江西提學。連疏乞歸。學者稱未軒先生。遺集為韶州同知孫希白編梓，校者均孫氏彙季，或其從學諸生耶？幃詞附載集中，為乙其駢序，錄存之。乙丑二月，叔雍校記。

丙子五月二十九日，未雍校傳鈔益山集本。

129 瓊臺詞一卷 瓊山丘濬仲深撰

仲深，初舉鄉試第一，景泰五年，登進士第，改庶吉士，授編修，進侍講。與修《英宗實錄》，進侍講學士。《續通鑑綱目》成，擢學士，進禮部右侍郎，掌祭酒事，陞禮部尚書，掌詹事府事。修《憲宗實錄》，充副總裁，書成，加太子太保兼文淵閣大學士，參預機務，加少保。卒贈太傅，諡文莊。正德中，賜諡於鄉，曰景賢。有《瓊臺會稿》，詩餘並附。向與海忠介公齊名，學者為刊《邱海合集》。余嘗得《會稿》，為次其詞，以列於盛明諸家云。丙寅秋仲，叔雍。

同日以傳鈔益山藏本校。高梧手記。

130 楓山先生詞一卷 蘭谿章懋德懋撰

懋，字德懋，學者稱楓山先生。成化二年會試第一，登進士第，改庶吉士。明年，授編修。以元夕張鐙命撰詩詞忤旨，並請停止炷火被杖，貶臨武知縣。未行，改南京大理寺評事。逾三年，遷福建僉事，滿考致仕歸。弘治中，起南國子監祭酒。

正德二年，乞休得請。五年，起雲南太常卿，又起南禮部右侍郎，皆力辭。嘉靖初，即家進南禮部尚書，致仕。卒贈太子少保，諡文懿。有集四卷，詞附，蓋酬應幃詞也，為迻寫彙刊之。乙丑天中節，珍重閣書。

同日以傳鈔益山藏本校。未容。

131 懷麓堂詞一卷 茶陵李東陽賓之撰

東陽，字賓之，號西涯，茶陵人。四歲能作徑尺書，召試賜果鈔。後兩召講《尚書》，大義稱旨，命入京學。天順八年，登進士第，選庶吉士，授編修，累遷侍講學士，充東宮講官。弘治五年，進太常少卿，擢禮部右侍郎，兼侍讀學士。入內閣，參預機務，進太子少保、禮部尚書，兼文淵閣大學士。武宗立，屢加少保，兼太子太傅。劉瑾入司禮，東陽即日辭位。不許，加少師，兼太子太師。瑾誅，加東陽特進左柱國，以老疾乞休。卒贈太師，諡文正。有《懷麓堂集》，詞附，余得讀於金陵，因為裁篇，付鋟人云。丙寅人日，叔雍。

丙子五月，校傳鈔益山藏本，恩恩蓋十易寒暑矣。未雍讀記。

132 菴竹堂詞一卷 崑山葉盛與中撰

盛，字與中，號仲盛，別號蛻庵，又號涇東道人，又號澗東老漁，崑山人。正統十年，登進士第，授兵科給事中，進都給事中，擢右參政。督餉宣府，以李秉薦，協贊都督僉事孫安軍務，遭父憂歸。天順二年，召為右僉都御史巡撫兩廣，乞終制，不許。稍遷左僉都御史巡撫宣府。成化三年，入為禮部右侍郎，改吏部，轉左侍郎。十年卒，諡文莊。有《菴竹堂集》八卷，詞附。又有《水東文稿詩稿》、《涇東小稿》。與中富藏書，其《書目》盛傳於世。癸酉新歲，余過崑山，謁先生墓塋，碑仆蔓草中，蓋不勝其低徊矣。歸校其詞，以授鏗氏，並記歲月。叔雍。

同日以傳鈔益山藏本校之。珍重。

133 寓庵詞一卷 鄱陽葉蘭楚庭撰

蘭，字楚庭，別號醉翁，鄱陽人。隱居不仕。元末入明，至景泰中卒，年九十九歲。著《寓庵集》，其鄉後學史簡為刊之，附詞一首。金陵益山精舍藏其書，余獲讀而錄之，以授梓焉。丙寅秋日，叔雍。

同日校傳鈔益山集本。珍重。

134 坦齋先生詞一卷 茶陵劉三吾坦甫撰

三吾，初名如孫，以字行，號坦甫，又號坦之翁。元末為永平教諭，授靖江路儒學副提舉。洪武十八年，以薦授左贊善，陞翰林學士，授晉世子經。三十年，主會試，以多中南人，坐罪戍（還）〔邊〕。建文初召還，永樂中卒。有《瓊署》、《春坊》、《北園》、《知非》、《化鶴》、《正氣》等集，合為《坦齋集》，詞一卷附。按〈堯山堂外記〉：「三吾伯兄畊孫，元至順間守寧國，死之。季兄與孫為南堂同知，亦仗節死於臺城。」三吾并有詩哭之，曰「黃甲題名前進士，白頭死節古宣州。高城留得衷弘在，故友應同李黼游」；其挽與孫者曰「桂嶺使還猶有信，杉關路斷竟無書。生前有恨臺城死，身後無家故國虛」。詩筆亦矯健可喜也。丙寅小冬，叔雍書。

同日校傳鈔益山藏本。高梧。

135 周恭肅公詞一卷 吳江周用行之撰

用，字行之，號白川，吳江人。弘治十五年，登進士第，授行人。正德初，補禮科給事中，改南京兵科。出為廣東參議，預平番禺盜有功。歷浙江、山東副使，擢福建按察使，改河南右布政使。嘉靖八年，擢右副都御史巡撫南贛。召協理院事，歷吏部左、右侍郎，調南京刑部，就遷右都御史，工、刑二部尚書。九廟災，自陳致仕。久之，以工部尚書起督河道，改漕運。未行，召拜左都御史，加太子少保，進吏部尚書。卒贈太子太保，諡恭肅。有集十六卷，詩餘附，南北曲亦雜置其間，今汰去之，僅刻其詞。丙寅立冬日，叔雍。

同日校傳鈔益山藏本。高梧軒。

136 詩餘圖譜二卷 曹縣萬惟檀子馨撰

惟檀，字子馨，曹縣人。由恩貢授直隸曲陽縣令，尋補湖廣保康縣。抵任三月，闖賊以數萬騎來攻，城陷被執，不屈死之。妻李氏同死。長子士燦并妻路氏、妾閻氏，抱幼女同赴水死。是時主僕男婦一門死節者凡十六人，嗚呼烈矣。所撰《圖譜》，概以己作旁譜而成之，取法南湖者也。詞非專詣，韻律猶多舛謬，獨以訂譜，亦復不思之甚。惟所作亦有疏秀處，而大節凜然，更不可沒。斐雲宗兄得見萬曆元刻本於京師，亟以寄眎，不忍聽其湮逸，因依式重雕，並考索其行誼，用為之跋。甲戌六月下澣，武進趙尊嶽。

丙子五月抄，以明刻本校一過。高梧。

137 秋佳軒詩餘十二卷 金陵易震吉月槎撰

震吉，字起也，號月槎，上元人。崇禎七年，登進士第，授刑部主事，陞郎中，出為大名知府，歷嘉湖道、江西參政副使。有《秋佳軒詩餘》十二卷，明人作詞，此其篇帙最富者也。詞筆取徑稼軒一流，力求以疏秀取勝，雖不能至，猶較顰眉鬪齒強增色澤者為善矣。甲戌歲暮，校刊竣事，並為之跋。武進趙尊嶽書。

丙子五月，以傳鈔益山本校。未邕。

138 省愆詞一卷 永嘉黃淮宗豫撰

淮，字宗豫，號介庵。舉洪武丁丑進士，授中書舍人。成祖即位，召對稱旨，被顧問。既直文淵閣，改翰林編修，進侍講，以爭立太子事左遷。永樂五年，進右春坊大學士，漸與胡廣等輔導太孫。七年，帝北巡，命輔皇太子監國。後以帝歸，太子使迎少緩，詔獄罪淮等，繫十年。仁宗即位，始復官，尋擢通政使，武英殿大學士，進少保，戶部尚書兼大學士。宣德元年，帝親征，命淮留守。明年疾，乞休，英宗立，再入朝。正統十四年六月卒，年八十三，諡文簡。淮歷相兩朝，有古大臣風，著《介庵集》、《省愆集》、《歸田稟》。其題「省愆」者，蓋繫獄所作也。《介庵集》凡十五卷，《四庫》著錄，翰林院儲明刻本。遜學齋藏影明寫本。又《明史藝文志》、《百川書志》、《千頃堂書目》並著錄《省愆詞》一卷。明刊集本則附詞二十四闕，蓋詞集固嘗以合行者矣。仁和丁氏舊藏《省愆集》，後歸益山書藏，余飭胥錄詞，僅得十闕。恐有脫落，惜無從得他本為補足也。丁卯四月，叔雍。

丙子七月十六日，以傳鈔益山集本校。未邕。

139 巽隱詩餘一卷 桐鄉程本立原道撰

本立，字原道，崇德人（按：《善本書室藏書提要》作桐鄉人）。洪武九年，舉明經，推秦王府引禮舍人，以母憂去。復改周王府禮官，從王入覲，坐累謫雲南馬龍他郎甸長官司吏目。建文初，以薦召入翰林，陞左僉都御史。靖難兵至，自經於應天府學（按：丁氏《提要》云：「出為江西按察副使，適靖難兵已進京師，悲憤自盡。」）。有《巽隱集》四卷，詞附，因裁錄之。乙卯四月，高梧軒。

同日以傳鈔益山藏本校。未邕。

140 半江詞一卷 吳江趙寬粟夫撰

寬，字粟夫，吳江人，號半江。成化十七年，以會試第一登進士第，授刑部主事，官至廣東按察使。為文雄渾秀整，卓然大家，行草亦清潤。有《半江集》傳世，詞附，並復雅令可誦。茲付梓人，用廣其傳播云。乙亥人日，高梧軒記。

同日以傳鈔益山藏本校。未邕。

141 林見素詞一卷 莆田林俊待用撰

俊，成化進士，拜刑部主事，進員外郎。二十年，帝惑淫僧，尊為法王，廷臣嘿不敢發。俊上疏諫，帝大怒，下詔獄考訊，罪幾不測。太監懷恩請曰：「殺俊，且失天下人心，奴死不奉詔。」始得不死，謫姚州判官。弘治元年，擢雲南副使。五年，調湖廣。九年，引疾歸。十三年，起南京右僉都御史，以母憂歸。迨至正德四年，起撫湖廣，改四川。世宗即位，進工部尚書，改刑部尚書。二年，致仕卒。俊蓋直臣也，為錄其詞，並徵其行誼。戊辰元月，叔雍記。

同日以益山藏本傳鈔本校。高梧。

142 費文憲公詞一卷 鉛山費宏子充撰

費宏，字子充，成化中，以會試第一人登進士第，授修撰。正德中，累遷至戶部尚書。時侍臣錢寧陰黨宸濠，欲交歡於宏，不可得，因以他事中傷之，宏遂乞休歸田。迨宸濠敗，言者爭薦宏。迨世宗即位，起加少保，入輔政。宏持重識大體，明習國家故事。及楊廷和去位，遂為首輔，委任甚至。後復為張璁、桂萼所構，致仕。及萼死，璁亦去位，帝追念宏，再起之。卒諡文獻。有《宸章集錄》及遺集行世。《明史》自有傳。余曩歲薄游金陵，得就益山書藏裁寫其詞，窮移晷之功，付諸剞劂，因並徵其行誼為跋。趙叔雍書。

同日以傳鈔益山藏本校。珍重閣。

143 改亭詩餘一卷 崑山方鳳時鳴撰

時鳴，正德戊辰進士，與兄方鵬同榜，除行人，選監察御史，出為廣西提學。著《改亭存稿》十卷、《續稿》六卷，詞在《續稿》中。仁和丁氏八千卷樓藏書，余得讀於金陵，為輯存之。戊辰伏日，高梧軒。

同日以傳鈔益山藏本校。未雍。

144 登州詞一卷 閩漳林唐臣元凱撰

唐臣，後名弼，龍谿人。至正八年進士，拜吏部主事。庚戌，奉使安南，事竣，安南王命中使夜攜五百金密投弼榻，詰朝，使從官復餉五百金，他物稱是，弼率卻不受。漸遷金城令，有為姦者，誣以受賄，帝詔獄釋之。官至登州知府，以疾卒。弼工書，嘗與王太史廉論書，謂筆法須偏正兼備，乃臻妙境，近世趙孟頫側筆太多，故不能逃書家清議耳。著《登州集》，詞附，亦丁氏故物也。己巳四月，高梧軒書。

同日以傳鈔益山藏本校。未雍。

145 思玄詞一卷 海虞桑悅民懌撰

悅，成化舉人，簡柳州府通判，丁外艱歸，遂隱居不出。其人怪妄，輒以大言鳴於時。著《桑子庸言》及《思玄集》。《明史》有傳，附見徐禎卿傳後。余在金陵益山書藏讀其書，為逐寫其詞，合之有明中葉諸家云。珍重閣記。

同日以益山藏本傳鈔本校。未雍。

146 顧文康公詞一卷 崑山顧鼎臣九和撰

顧鼎臣，字九和。弘治間，以第一人登進士第，授翰林院修撰，累遷至禮部右侍郎。世宗為神仙術，內殿設齋醮。鼎臣進〈步虛詞〉七章，優詔褒答。明代詞臣，每以青詞結主知，蓋自此始。尋以禮部尚書兼文淵閣大學士，入參機務。時貴谿夏言當國，專擅朝政。鼎臣素性柔和，不能有所建白，備位而已。崑山舊治無城郭，鼎臣言於當事者，始修建之。後（矮）〔倭〕亂，遂得獲全。尋卒於官，諡文康。《明史》有傳。遺集中附小詞，有與桂洲酬和者，併存其元作，茲為依式重梓之，亦以見匪躬之節，固非易語於常人也。乙亥新歲五日，珍重閣。

同日以傳鈔益山藏本覆勘一過。雍。

147 何文簡公詞一卷 郴陽何孟春子元撰

子元，弘治進士，師事李東陽，學問該博。屢遷至右副都御史，巡撫雲南，討平米寨叛蠻。嘉靖初，任禮部侍郎。大禮議起，上疏力爭之，又偕百官伏闕號泣，奉旨奪俸，調南京工部，遂引疾歸。卒諡文簡。著《疏議》、《餘冬序錄》、《家語注》及《何燕泉詩》。《明史》有傳。二詞附見集中，為裁刊之。甲戌九秋，叔雍記。

同日以傳鈔益山藏本校。高梧。

148 東軒詞一卷 臨川聶大年壽卿撰

聶大年，字壽卿，臨川人。博學，工詩古文詞，書擅率更體，為時人所珍祕。宣德末，薦授仁和教諭。母卒歸葬。哀感行路。里人列其母子賢行上之官，詔旌其門。景泰中，以修史徵入翰林。卒。所著《東軒集》行於世，《補遺》一卷，中有賦八景詞，為遂錄之。甲戌五日，叔雍書。

同日以益山藏本傳鈔本校定。高梧。

149 運甓詞一卷 廬陵李禎昌祺撰

禎，字昌祺，廬陵人，以字行。永樂進士，選翰林院庶吉士，預修《永樂大典》，僻書疑事，人多就質。歷廣西、河南左布政使，並多惠政。致仕二十餘年，屏跡不入公府，伏臘不充，敝廬僅蔽風雨。其品誼之高，可以想見。著《運甓集》，詞曲咸附集中，茲獨取其詞別行之。乙亥穀日，叔雍記。

丙子七月十七日，據傳鈔益山藏本校。未雍。

150 荷亭詩餘一卷 東陽盧格正夫撰

格，字正夫，東陽人。成化十七年，登進士第，除貴谿知縣，行取為江西道監察御史。有《荷亭文集》十四卷，詩餘附，每多酬應之作，蓋幃詞也。戊辰仲秋，叔雍校記。

同日以傳鈔益山藏本校。高梧。

151 方洲詩餘一卷 海鹽張寧靖之撰

靖之，海鹽人。景泰五年，登進士第，官至都給事中，出為汀州知府。《眉公祕笈》謂其奉使朝鮮，著《奉使集》，未之見。遺著《方洲集》，詞附存，亦酬酢所作為多。余前過金陵，得讀之，因錄覆本付梓。戊辰重三日，叔雍。

同日以傳鈔金陵益山藏本校。高梧。

152 峴泉詞一卷 貴谿張宇初子璿撰

宇初，字子璿，嗣漢四十二代天師正常之冢子。五歲讀書，十行並下。嘗見西北金扉洞開。洪武十年，方髻卅，襲掌道教，應詔見奉天殿。永樂八年示疾，書誦

而逝。有《峴泉集》二十卷，王仲縉序之。詩筆清利絕俗，詞亦道園之一流也。戊辰九月朔日，叔雍記。

同日以傳鈔益山藏本覆校。高梧。

153 青谿詩餘一卷 錢塘倪岳舜咨撰

岳，字舜咨，上元人，謙子。天順八年，登進士第，改庶吉士，授編修。成化中，歷侍讀學士，直講東宮。二十二年，擢禮部右侍郎，仍直經筵。弘治初，改左侍郎，進尚書，加太子太保，任南京吏部尚書，改兵部，參贊機務。召還，為吏部尚書。卒贈少保，諡文毅，有《清谿漫稿》二十四卷，詩餘附，僅一闕，為梓存之。戊（寅）〔辰〕九日，高梧軒。

同日以傳鈔益山藏本校。高梧。

154 滄浪耀歌一卷 天台陶宗儀九成撰

右《滄浪耀歌》一卷，附《陶南村集》中。南村名宗儀，字九成，黃巖人。元時舉進士，一不中，即棄去。古學無所不窺，工詩文。家貧，教授自給。洪武初，累徵不就。晚年，有司聘為教官。常客松江，躬親稼穡，暇則憩於樹陰，有所得，摘葉書之，貯一破盎。十年積盎十數，一日發而錄之，得三十卷，名《輟耕錄》，盛傳於世。其他《書史》、《四書》、《古刻叢編》之屬，纂述亦夥。《耀歌》則附於《南村詩集》以行者也。戊辰七月，高梧軒。

同日以傳鈔益山藏本校。未邕。

155 解學士詩餘一卷 吉水解縉大紳撰

縉，字大紳，一字縉紳，吉水人。洪武二十六年，登進士第，授中書庶吉士，改御史。好直言，為眾忌，上惜之，命侍父歸，進學十年。歸八年，太祖崩，入臨京師，坐違旨，謫河州衛吏。以薦召為翰林待詔。成祖即位，擢侍讀，直文淵閣，預機務，陞侍讀學士、翰林學士，兼右春坊大學士。漢王高煦譖之，謫廣西布政司參議，改交趾，命督餉化州。永樂八年，高煦又陷以他事，徵下獄。十三年，瘐死。成化元年，詔復官，贈朝議大夫。有《春雨齋集》十卷、《似羅隱集》二卷、《學士集》三十卷，詞則裁篇別出者也。戊辰小春日，高梧軒書。

同日以傳鈔益山藏本校勘一過。未邕。

156 馬端肅公詞一卷 鈞陽馬文升負圖撰

文升，字負圖，晚號三峰居士，鈞州人。景泰二年，登進士第，授御史，歷按山西、湖廣，遷福建按察使。成化初，召為南京大理卿，進左副都御史巡撫陝西，尋總制三邊軍務。入為兵部右侍郎，轉左。汪直傾之，下詔獄，謫戍重慶衛。直敗，起左副都御史巡撫遼東，進右都御史總督漕運，陞兵部尚書，以譖調南京。孝宗即位，召拜左都御史，遷兵部尚書，轉吏部，屢加少師，兼太子太師。年八十五卒，贈太傅，諡端肅。嘉靖初，加贈左柱國、太師。有集，詞附。余得集本於金陵，遂付寫官，以廣其傳云。戊辰小春，叔雍。

同日以傳鈔益山藏本校。高梧。

157 梓谿詞一卷 進賢舒芬國裳撰

芬，字國裳，號石灘，更字梓谿。世稱「忠孝狀元」，進賢人。十二歲，以郡守祝瀚薦補郡學生。正德十二年，以一甲第一名登進士第，授翰林修撰。疏諫南巡，受杖幾斃，謫福建市舶副提舉。世宗立，召復故官。嘉靖三年，議大禮，再杖奪俸，旋遭母喪歸。卒於家，年四十四。有集十卷，詞附，僅「送王陽明三首」耳，為裁錄之。戊辰長至日，高梧。

丙子七月十八日，以益山藏本傳鈔覆校。珍重閣。

158 簡平子詩餘一卷 嚳城王道通晉卿撰

王道通，字晉卿，嘉定人，居羅店，為邑諸生。負經濟才，遂不欲以文章自命，而文極古茂。居師沈賓之喪，（衷）〔衰〕麻三年，入其室，終身不敢正坐。居親喪，邑令謝三賓往訪之，道通辭焉，固請，乃不易服而見之。其篤行如此。遺著《簡平子集》，附詩餘九首。彊邨翁舊於友人案頭見之，親為傳錄見貽。越七年，為錄之木。墨瀋猶新，翁已謝世，中夜讎校，人琴之慟，固有不能自己者也。甲戌孟夏，趙尊嶽識。

丙子七月十八日，以彊邨翁寫本校。未邕手記。

159 芳芷樓詞二卷 錢塘高濂深甫撰

高濂，字深甫，號瑞南，萬曆間人。工樂府，尤以南曲馳名，所著《玉簪記》為世所傳誦，被之絃管，雖元四大家無以過也。又著《遵生八箋》，志性嫻雅，所

載多煙雲供養之事、營養調攝之功。文人結習，往往如此。又《雅尚齋詩》、《芳芷棲詞》。茲得讀仁和丁氏八千卷樓藏本，為重梓之。乙亥新歲六日，珍重閣雨窗識。

丙子七月十八日，以傳鈔丁藏本福校。未邕。

160 江南春詞集一卷 無錫倪瓚元鎮撰

《江南春詞集》一卷，未見明寫本，蓋代有增作，未嘗彙為專集，逮萬曆朱之蕃始合而書之也。原本展轉收藏，具見方跋，自方刻出而其書始盛傳於世。江陰金滄生丈又增輯《清閨〔閣〕集》及所載周詞、《聽秋聲館詞話》所載薛詞，合為《附錄》，並以清代陳其年以次四家為《續附錄》而重錄之，輯入《粟香室叢書》。滄生丈曩以貽示，歡喜展讀。越二十年，余刻此詞，即用全本合二續錄為一卷，序跋率如舊。而丈墓木已拱，不及再見，山陽之感，為可勝慨耶？癸酉歲不盡八日，尊嶽校識。

161 內臺詞一卷 浚川王廷相子衡撰

廷相，字子衡，儀封人。弘治進士，選翰林院庶吉士，授兵科給事中。因事忤中官劉瑾、廖鏜，遂爾屢黜屢起。嘉靖中，以右副都御史巡撫四川，討平茫部賊沙保，累遷至左都御史。廷相博學好議論，以經術著稱。卒諡肅敏，《明史》自有傳。其所著《內臺集》附詞至富，為別行之。乙亥人日，高梧軒書。

162 穀庵詞一卷 嘉興姚綬公綬撰

綬，輔子，字公綬，號穀庵，又自號雲東逸史。天順間進士，簡監察御史。成化初，為永寧郡守。迨解官，築室曰「丹邱」，獻詠其中，一時人稱「丹邱先生」，蓋自擬於隱逸之流者。工詩畫，著《雲東集》，杭州西湖書藏有之。余疇昔買舫往游，獲觀斯帙，因摘而存之。扣舷放歌，中流容與，亦竊自比於雲東也。甲戌長至，高梧軒。

163 匏翁詞一卷 長洲吳寬原博撰

匏翁，長洲人，以文行有聲於諸生間。成化中，會試、廷試皆第一，授翰林院修撰。侍孝宗於東宮，每進講，閒雅詳明。迨孝宗即位，以舊學遷左庶子，預修《憲

宗實錄》。累遷掌詹事府，入東閣，典誥勅，進禮部尚書。卒諡文定。《明史》有傳。匏翁行履高潔，不為激矯，而自守以正，不少阿附。於書無所不窺，作詩文雅有典則，兼工書法。詞亦窺見門徑，不同庸下，因為彙存之。甲戌重九日，珍重閣。

164 休庵詞一卷 南陵盛於斯此公撰

於斯，南陵人。先世有義聲，屋多藏書，十餘歲即能讀等身書，有聲邑里。明季鼎革之際，散金結客，不治生產，漸病盲。家居屏跡，壹意著述，成《毛詩名物考》、《休庵雜鈔曆法》、《輿地考》、《羣書考索》各若干卷，歿後俱不傳。大梁周櫟園為經紀其喪，並梓其遺稿之僅存者，曰《休庵集》，前有佟國棟、甘文奎、陳周政及亮工所為序，傳本亦極罕覯。南陵徐氏積學齋幸而得之，為刊入《南陵先哲遺書》中，余蓋就《遺書》本裁篇授梓者也。乙亥重五日，珍重閣記。

165 樂府遺音一卷 錢塘瞿佑宗吉撰

右《樂府遺音》一卷，從明影鈔天順七年刊本傳錄，大半皆塞垣所作。《四庫》附存有《存齋樂府》五卷，當為別本，余未之見。按先生生於元至正七年丁亥七月十四日，詞中有「今朝初度，明日中元」之句。祖居薦橋街，少不得於親。年十四，有鄉人張彥復自福建檢校回，瞿翁款以雞酒，先生歸自學舍，彥復指雞命賦，應聲云：「宋宗窗下對談高，五德聲名五彩毛。自是范張情義重，割烹何必用牛刀。」彥復稱賞，寫桂以贈云：「瞿君有子早能詩，風采英英蘭玉姿。天上麒麟原有種，定應高折廣寒枝。」瞿翁遂構「傳桂堂」。洪武元年，先生二十二歲，凌彥翀、邱彥能、吳敬夫相與訂忘年交。楊廉夫訪之，出所作〈香籀詠〉以示，先生悉和之，廉夫歎曰：「此瞿家千里駒也。」凌彥翀作〈梅柳爭春〉，先生一日盡和之，凌亦驚歎。長苦不第，築一室，自署曰「西泠草堂」。洪武十年，先生卅一歲，寄居外家，富子明氏有餘清樓，調寄〈摸魚兒〉，製「西湖十景詞」十闕，盛傳人口。此卷〈沁園春〉詞有「陳士謙為余製吳山舊隱圖」，題云「烏龍潭畔，城隍祠後」，正其地也。以明經薦，筮仕于仁和、臨安、宜陽三邑庠。陞國子助教，復陞周府右長史，克勝輔導，故詞中自壽，有「四度儒宮設講，六載王門效職」之句。建文元年，五十三歲。越五載為永樂改元，旋以詩禍，編管保安。太師英國張公延為西賓，甚加禮貌，詞中有云「自罹罪謫，逾十寒暑」之語，按之先生貶謫，當在永樂五、六年間也。迨洪熙元年始釋歸，先生已七十九歲。著《歸山詩話》。府志稱復原職

內閣辦事，他書無徵。宣德八年，先生卒，壽八十有七，葬錢塘之甘谿。余集刊宋元明武林諸名家詞，擬以此卷入梓，因詳加詮次云。光緒丁亥二月十二日，為亡婦陸氏三週忌辰，禮佛雲棲，鐙下漫識。丁丙。

曩嘗見《四庫提要》著錄《存齋樂府》，曩往求之不可得。漸在金陵益山書藏，得見丁氏八千卷樓藏《樂府遺音》，差以自慰，命胥逐寫。按，佑學博才（瞻）〔瞻〕，洪武中為臨安教諭，永樂間官周王府長史，以詩禍編管保安，洪熙中釋歸，復原職，內閣辦事，著述自娛。此卷塞外之作較夥，當為北歸後所編也。戊辰重三日，高梧軒。

166 邃谷詞一卷 信陽戴冠仲鵬撰

仲鵬，正德進士，一作吉水人。為戶部主事，上疏極諫，貶廣東烏石驛丞。嘉靖初起官，歷山東提學副使，以清介聞。嘗從何景明學詩，著《邃谷集》，詞附，以和朱淑真《斷腸詞》者為多。余見明刊集本，遂錄其詞，以授鈔焉。戊辰七日，叔雍書。

167-169 憑几詞一卷山中詞一卷浮湘詞一卷 蘇州顧璘華玉撰

華玉，蘇州人，寓居上元。弘治進士，授廣平知縣，仕至南京刑部尚書。少負才名，詩以風調取勝，與同里陳沂、王韋號「金陵三俊」。後寶應朱應登繼起，號「四大家」。虛己好士，如恐不及。歷官有才能，晚罷歸，構息園，大治居舍，以接賓客，客常滿。著《浮湘》、《山中》、《憑几》諸集及《息園詩文稿》、《國寶新編》、《近言》三書，合之為《顧華玉集》。今分著其詞，而沿其舊名云。戊辰二月，叔雍書。

170 東洲詞一卷 維揚崔桐來鳳撰

東洲，正德進士，授編修。武宗議南巡，上疏力諫，致被廷杖。嘉靖中，晉禮部右侍郎，卒。著《東洲集》，詞附，多酬應之作。明人好幃詞致語，於此見之。戊辰重三日，珍重閣書。